



Cymru Greadigol Creative Wales

NODIADAU CYFARWYDDYD ALLANOL

Cronfa Bartneriaeth Cymru Greadigol

Galwad Agored 2026/27

Bydd y nodiadau cyfarwyddyd hyn yn eich helpu i lenwi'r cais am gyllid ar gyfer Cronfa Bartneriaeth Cymru Greadigol.

1. Cymru Greadigol - Cyd-destun Strategol

Mae'r Diwydiannau Creadigol yn rhan bwysig o economi Cymru, gan greu swyddi a chyfoeth, cyfrannu at frand cenedlaethol cryf a hyrwyddo Cymru yn y byd. Mae Cymru Greadigol rhan o Lywodraeth Cymru, ac fe'i sefydlwyd yn benodol i roi hwb pellach i dwf y diwydiannau creadigol yng Nghymru ac i gynnig gwasanaeth effeithlon, deinamig ac arloesol i'r sector.

Uchelgais Cymru Greadigol yw sicrhau bod Cymru yn y sefyllfa orau i greadigrwydd ffynnu drwy sbarduno twf ar draws y diwydiannau creadigol, adeiladu ar lwyddiant y presennol, a datblygu talent a sgiliau newydd.

2. Pwrpas y Gronfa

Bydd Cronfa Bartneriaeth Cymru Greadigol yn cefnogi un neu ragor o'r themâu blaenoriaeth [\(fel y nodwyd yn 2020\)](#) isod:

- **Canolbwyntio ar Dwf** – parhau i sbarduno twf y sector Creadigol yng Nghymru gyda ffocws wedi ei dargedu'n rhanbarthol ac ar sectorau penodol.
- **Cefnogi Sgiliau** – sicrhau ein bod yn meithrin y sgiliau cywir ar draws y sector i gefnogi twf parhaus a gweithio'n agos gyda'r diwydiant.
- **Amrywiaeth i bawb** – hyrwyddo sector amrywiol sy'n darparu cyfleoedd a chydaddoldeb i bawb, ac ar y cyd â'r diwydiant, codi safonau a hyrwyddo amrywiaeth a chydaddoldeb ar draws y sector.
- **Cymorth Effeithlon i'r Sector** – parhau i ymateb ac adweithio i anghenion newidiol y sector drwy ddatblygu cynlluniau cyllido i dargedu cymorth i'r diwydiant creadigol a sicrhau ein bod yn gallu ymateb ar yr un cyflymder ag mae'r sector hwn yn gweithio;
- **Adeiladu ar y Brand** – parhau i ddatblygu'r brand wrth farchnata a hyrwyddo'r diwydiannau creadigol yng Nghymru i'r byd a hyrwyddo cyfraniad y sector creadigol at enw da a llwyddiant Cymru yn fyd-eang.

Nod y cyllid hwn yw dod â blaenoriaethau ffrydiau cyllido cystadleuol Cymru Greadigol sy'n cael eu harwain gan y sector at ei gilydd i ddarparu cynllun cymorth

integreiddiol ar gyfer rhanddeiliaid/partneriaid strategol yn y sector. Bydd yn ategu gweithgarwch sy'n ceisio helpu i dyfu'r sectorau blaenoriaeth, gan gynnwys teledu, ffilm, gemau, animeiddio, cerddoriaeth, seilwaith stiwdio, darlledu, y cyfryngau, newyddiaduraeth a chyhoeddi. Gall hefyd ategu gweithgareddau datblygu sgiliau a thalent.

Pwy all wneud cais?

- Rhaid i ymgeiswyr fod yn gweithredu yn y sector creadigol yng Nghymru.
- Rhaid i ymgeiswyr fod wedi eu lleoli yng Nghymru ac yn gweithredu yno. Os yw y tu allan i Gymru, rhwch gyfiawnhad i gefnogi eich cais. Sylwch mai un o'r meini prawf cyffredinol yw bod ceisiadau'n cael eu cyflwyno gan sefydliadau sydd wedi eu lleoli yng Nghymru. Fodd bynnag, gallwn ystyried prosiectau strategol fesul achos os yw'r pencadlys y tu allan i Gymru ar yr amod bod y buddiolwyr/effaith yng Nghymru.
- Rhaid bod y busnes wedi bod yn masnachu cyn 1 Ebrill 2025 ac yn dal i fasnachu (bydd angen tystiolaeth o hyn ar ffurf cyfrifon ariannol o'r cyfnod ariannol diwethaf)
- Os yw trosiant y busnes yn fwy na £90,000, rhaid bod y busnes wedi cofrestru at ddibenion TAW neu fod y sector wedi ei eithrio rhag TAW. Ceir manylion am eithriadau rhag TAW yn:
<https://www.gov.uk/guidance/vat-exemption-and-partial-exemption>

Unig Fasnachwyr / Partneriaethau – Meini Prawf Cymhwysedd i Ymgeisio

- Gall unig fasnachwyr nad ydynt yn cyflogi unrhyw staff eraill wneud cais os ydynt yn bodloni'r holl feini prawf eraill. I gefnogi eu cais, bydd gofyn iddynt gyflwyno copi o'u Ffurflen Dreth Hunanasesiad ddiweddaraf sy'n dangos yr enillion a'r dreth sy'n ddyledus, a thystiolaeth bod y taliad wedi ei wneud.
- Ers 1 Ebrill 2025, rhaid i ymgeiswyr dalu gweithwyr drwy Talu Wrth Ennill.
- Os mai dim ond 1 unigolyn mae ymgeiswyr yn ei gyflogi, rhaid ei dalu drwy Talu Wrth Ennill.
- Sylwch fod yn rhaid i'r 1 gweithiwr fod yn Gyfwerth ag Amser Llawn a gweithio o leiaf 30 awr yr wythnos. Gall hyn gynnwys staff rhan amser ond rhaid iddo fod yn gyfwerth ag o leiaf 1 cyfwerth ag amser llawn. Hynny yw, rhaid i gyfanswm yr oriau mae gweithwyr rhan-amser yn eu gweithio'n rheolaidd gyfateb i 30 awr neu fwy yr wythnos.
- Nid ydym yn cefnogi defnyddio contractau dim oriau mewn modd annheg. Os yw'r rhain yn cael eu defnyddio, ni ddylid eu gosod yn unochrog, a dylid cynnig contract oriau gwarantedig i weithwyr.

Cwmni Cyfyngedig – Meini Prawf Cymhwysedd i Ymgeisio

- Rhaid i ymgeiswyr fod wedi bod yn gwmni Cyfyngedig ar 1 Ebrill 2025.
- Rhaid i gwmnïau cyfyngedig fod wedi bod yn cyflogi rhwng 1 a 249 o weithwyr drwy'r system Talu Wrth Ennill ar 1 Ebrill 2025.
- Os mai dim ond 1 unigolyn mae ymgeiswyr yn ei gyflogi, gall hwn fod yn berchennog y busnes, ond rhaid ei dalu drwy Talu Wrth Ennill.

- Sylwch fod yn rhaid i'r 1 gweithiwr fod yn Gyfwerth ag Amser Llawn a gweithio o leiaf 30 awr yr wythnos. Gall hyn gynnwys staff rhan amser ond rhaid iddo fod yn gyfwerth ag o leiaf 1 cyfwerth ag amser llawn. Hynny yw, rhaid i gyfanswm yr oriau mae gweithwyr rhan-amser yn eu gweithio'n rheolaidd gyfateb i 30 awr neu fwy yr wythnos.
- Nid ydym yn cefnogi defnyddio contractau dim oriau mewn modd annheg. Pan fydd y rhain yn cael eu defnyddio, ni ddylid eu gosod yn unochrog, a dylid cynnig contract oriau gwarantiedig i weithwyr.

Rheolau cyffredinol eraill y gronfa

- Mae mentrau cymdeithasol yn gymwys, ond rhaid bodloni'r meini prawf a amlinellir ar gyfer Unig Fasnachwr uchod oni bai fod ymgeiswyr wedi eu hymgorffori, ac os felly bydd y meini prawf ar gyfer cwmnïau cyfyngedig yn berthnasol.
- Os cynigir dyfarniad, rhaid i ymgeiswyr gwblhau eu prosiect yn llawn erbyn 31 Mawrth 2027.
- Nid yw Llywodraeth Cymru yn cefnogi gweithgareddau penodol sy'n debygol o fod yn ddadleuol o ran defnyddio arian cyhoeddus yn briodol. Mae hyn yn cynnwys busnesau sy'n gysylltiedig â (1) hyrwyddo dibenion gwleidyddol; (2) hyrwyddo safbwyntiau seciwlar, crefyddol neu wleidyddol penodol; (3) gamblo; (4) pornograffi; (5) cynnig gwasanaethau rhywiol; (6) unrhyw fath o weithgareddau anghyfreithlon; neu (7) unrhyw fath o weithgaredd a allai, yn ein barn ni, ddwyn anfri ar Lywodraeth Cymru.
- Rhaid i fusnesau a gefnogir fwriadu parhau i fasnachu a chynnal y swyddi sy'n bodoli adeg ymgeisio y tu hwnt i 1 Ebrill 2027.
- Rhaid i geisiadau gael eu cyflwyno gan berchennog y busnes ac nid gan asiantau sy'n gweithredu ar ei ran. Bydd ceisiadau a gyflwynir gan asiant ar ran busnesau yn cael eu gwrthod.
- Ni fydd y gronfa hon yn cefnogi busnesau masnachfaint.
- Ni fydd unrhyw brosiect sy'n cynyddu ôl troed carbon y busnes sy'n gwneud cais yn cael ei gefnogi drwy'r gronfa hon.
- Ni fydd unrhyw brosiect sy'n arwain at ddiswyddo staff yn cael ei gefnogi drwy'r gronfa hon.
- Nid ydym yn cefnogi defnyddio contractau dim oriau mewn modd annheg. Pan fydd y rhain yn cael eu defnyddio, ni ddylid eu gosod yn unochrog, a dylid cynnig contract oriau gwarantiedig i weithwyr.

Am beth alla i wneud cais?

Rhaid i'r cais am gyllid fod yn gysylltiedig â phrosiect sy'n mynd tuag at gefnogi gweithgarwch a fydd yn helpu i dyfu'r sectorau blaenoriaeth, gan gynnwys teledu, ffilm, gemau, animeiddio, cerddoriaeth, seilwaith stiwdio, darlledu, y cyfryngau, newyddiaduraeth a chyhoeddi ac i sbarduno sgiliau a gweithgarwch datblygu talent yn y sectorau hyn yng Nghymru.

Sylwer:

- Mae prosiect yn cael ei ystyried i fod yn weithgaredd sydd wedi ei gyfyngu gan amser, gyda dyddiad dechrau a dyddiad gorffen clir.
- Rhaid i geisiadau gynrychioli gwerth da am arian a bydd hyn yn rhan o'r asesiad.
- Dylai prosiectau gyflawni blaenoriaethau penodol Cymru Greadigol fel y nodir yn adran 2
- Dylai prosiectau ddangos agwedd gynhwysol a cheisio gwella cydraddoldeb ac amrywiaeth yn y sectorau creadigol
- Dylai prosiectau gyfeirio at sut maent yn bodloni saith nod llesiant Deddf Llesiant Cenedlaethau'r Dyfodol (Cymru) 2015
- Bydd angen i brosiectau ddangos arian cyfatebol gan bartneriaid eraill
- Dylai prosiectau ddangos model ariannol ar gyfer parhau â'r ddarpariaeth y tu hwnt i oes y prosiect.
- Dylai prosiectau ddangos ymgysylltiad y diwydiant a gweithio mewn partneriaeth â darparwyr a rhanddeiliaid eraill
- Bydd prosiectau y gellir eu cyflwyno'n ddwyieithog (Cymraeg a Saesneg) yn cael eu hystyried yn ffafriol
- Bydd angen i brosiectau dethol ddangos canlyniadau clir gyda methodoleg fanwl o sut bydd y prosiect yn cael ei werthuso.

Ar gyfer prosiectau sy'n ymwneud â sgiliau,

- Rhaid i bob prosiect gyflawni o leiaf un o'r 10 blaenoriaeth y tynnir sylw atynt yn y Cynllun Gweithredu Sgiliau Creadigol. Rhaid i brosiectau beidio â dyblygu darpariaeth hyfforddi sydd eisoes yn bodoli yn y diwydiannau creadigol yng Nghymru. Ni fyddwn yn cefnogi gweithgareddau na rhaglenni dyblyg sy'n cael eu cyllido'n llawn drwy gyllid cyhoeddus arall
- Rhaid i ymgeiswyr allu dangos y bydd eu prosiect hyfforddi o fudd penodol i unigolion/cwmnïau yng Nghymru
- Dylai prosiectau sy'n ceisio darparu lleoliadau gwaith, mentora a phrofiad yn y diwydiant gyflawni'r uchelgeisiau cyflogadwyedd ehangach a nodir yn Cymru Gryfach, Decach a Gwyrddach: cynllun cyflogadwyedd a sgiliau a'r Warant Pobl Ifanc
- Ni fydd cyllid yn cael ei ddyfarnu i brosiectau sydd o fudd i gwmnïau unigol yn unig. Mae Rhaglen Sgiliau Hyblyg Llywodraeth Cymru yn darparu cymorth ariannol i gwmnïau sy'n dymuno uwchsgilio eu staff.
- Byddem yn disgwyl gweld y costau y gofynnir amdanynt yn cael eu defnyddio, lle bo hynny'n bosibl, ar wariant yng Nghymru neu o Gymru. Os nad yw hyn yn bosibl, bydd disgwyl esboniad o'r rhesymau pam.

Dyma enghreifftiau o wariant:

Yr holl weithgareddau datblygu gan gynnwys:

- Costau ymchwil ac archwilio
- Cyflogau a chostau gweithwyr llawrydd
- Paratoi triniaeth/beibl
- Datblygu'r sgrïpt a'r stori
- Costau technegol a chynhyrchu

- Creu cyflwyniad a/neu ddec pitshio, hynny yw triniaeth/darluniau (cymeriadau, amgylchedd a chefnidiroedd)/profion animeiddio/demo
- Costau creu bwrdd stori ac animatig
- Costau cerddoriaeth a recordio
- Costau golygu
- Hawliau eiddo deallusol/cyfreithiol
- Marchnata cychwynnol llai na 5% o gyfanswm gwerth y prosiect
- Cyfieithu (os yw'n berthnasol)
- Ymchwil (os yw'n berthnasol)
- Paratoi cyllideb cynhyrchu
- Paratoi cynllun cyllido
- Gweithgareddau amserlennu cynhyrchiad
- Paratoi strategaeth farchnata
- Ffilmio promo/peilot/rhagflas neu Sizzle Reel
- Costau teithio a chynhaliaeth, hynny yw petrol, bwyd neu lety (costau rhesymol ac yn benodol gysylltiedig â'r prosiect)
- Cyn-gynhyrchu
- Dylunio'r cysyniadau – fideo chwarae/crynodeb pitshio
- Creu Dogfen Dylunio Gêm
- Ysgrifennu
- Prototeip digidol
- Creu cynnwys/asedau UI a dylunio graffeg
- Creu cynnwys/asedau gweledol 3d
- Datblygu/rhaglennu
- Dylunio sain / cynhyrchu sain
- Creu sleisen/demo o gêm y gellir ei chwarae
- Profi a sicrhau ansawdd
- Marchnata cychwynnol llai na 5% o gyfanswm gwerth y prosiect
- Hawliau eiddo deallusol/costau cyfreithiol
- Graddfa PEGI
- Paratoi adnoddau ar gyfer cyflwyno'r prosiect hyfforddi
- Ffioedd siaradwyr
- Ffioedd hyfforddwyr
- Llogi ystafelloedd
- Costau swyddfa/gweinyddol
- Cyllid bwrsariaeth ar gyfer cyfranogwyr gan gynnwys costau gofal plant a theithio

Ni chewch wneud cais am y canlynol

Ni ellir defnyddio'r grant ar gyfer y gweithgareddau a ganlyn:

- Costau cychwyn, e.e. offer a swyddfa, costau recriwtio ac ati;
- Costau sy'n codi cyn dyddiad dechrau'r cyfnod cyllido (ar ôl i ni dderbyn y llythyr cynnig wedi ei lofnodi).
- Talu dyled flaenorol (cyn 1 Ebrill 2026);
- TAW y gellir ei hawlio'n ôl;

- Costau wedi eu cyllido o ffynonellau eraill o arian cyhoeddus;
- Swm ar gyfer incwm a gollwyd neu i ail-chwyddo eich cronfeydd wrth gefn;
- Ardrethi busnes;
- Ffioedd cyfreithiol;
- Costau dileu swyddi;
- Unrhyw fath o weithgaredd a allai, yn ein barn ni, ddwyn anfri ar Lywodraeth Cymru;
- Costau sy'n gysylltiedig â hyrwyddo credoau mudiadau gwleidyddol neu ffydd;
- Prosiectau sy'n dibynnu ar lafur am ddim neu'n annog hynny
- Cyllid mewn nwyddau. Mae cyllid mewn nwyddau fel arfer yn cyfeirio at gyfraniadau a chymorth nad yw'n ariannol o ffynonellau eraill.

Ar ben hynn, ni ellir defnyddio'r arian i reoli a chydbwyso cyfrifon o fewn gwahanol weithrediadau'r un busnes. Er enghraifft, os oes gan gwmni un cyfrif ar gyfer rheoli/rhyddhau artistiaid, ac un arall ar gyfer gweithredu lleoliad.

Ni fydd y gronfa'n talu costau yr ymrwymwyd i'w cyflawni yn flaenorol, neu sy'n cael eu cefnogi ar hyn o bryd gan gronfeydd cyhoeddus eraill.

Hefyd, ni ellir defnyddio'r gronfa fel arian cyfatebol ar gyfer cais arall i Lywodraeth Cymru am gyllid.

Hefyd, ni chaiff busnesau sydd wedi eu clustnodi i'w cau, neu sydd mewn perygl o gau, wneud cais. Rhaid i ymgeiswyr llwyddiannus barhau i weithredu am o leiaf 12 mis ar ôl cael unrhyw gyllid. Os caiff busnes ei werthu neu ei ailgyfeirio, mae Llywodraeth Cymru yn cadw'r hawl i adennill unrhyw gyllid sydd wedi cael ei ddarparu.

Bydd angen i bob ymgeisydd gyflwyno cyfrifon busnes perthnasol fel rhan o'r broses ymgeisio. Bydd yr wybodaeth sy'n cael ei rhoi yma, ac mewn dogfennau perthnasol eraill, yn cael ei defnyddio i bennu a yw'r busnes yn anghymwys i gael cyllid o ganlyniad i'w amgylchiadau ariannol.

Faint o arian allwch chi wneud cais amdano?

Fel rhan o'ch cais, bydd gofyn i chi gyflwyno tystiolaeth bod gennych arian cyfatebol ar waith adeg gwneud y cais.

Sut bydd y broses ymgeisio'n gweithio?

Y Broses Ymgeisio

Galwad Agored

Cyn gwneud cais, mae gennych chi'r opsiwn i drafod eich cynnig gydag un o Reolwyr Datblygu'r Sector Cymru Greadigol drwy e-bost yn CymorthAriannuCymruGreadigol@llyw.cymru.

Gwneir ceisiadau ar gyfer CWPFF gan ddefnyddio'r Ffurflen Gais. Ar ôl ei llenwi byd angen ei chyflwyno i Cymru Greadigol, ynghyd â dogfennau ategol perthnasol (e.e. cyfrifon ariannol a datganiadau banc ar gyfer y 3 mis blaenorol i gadarnhau bod y busnes yn masnachu'n weithredol ac fel tystiolaeth o lif arian digonol).

Bydd y cyfnod cyllido cymwys yn cwmpasu'r dyddiad cymeradwyo ar y llythyr cynnig tan 31 Mawrth 2027. Mae'n bosibl y byddwn hefyd yn ystyried nifer fach o geisiadau gwariant prosiect sy'n ymestyn i flwyddyn ariannol 2027/28 ond mae'r gronfa hon yn canolbwyntio ar wariant prosiect yn 2026/27.

Mae hon yn gronfa yn ôl disgrisiwn sy'n amodol ar y gyllideb sydd ar gael ac nid oes proses apelio.

Y ffurflen gais

Mae 6 adran i'r ffurflen gais:

Adran 1 – Manylion yr Ymgeisydd

Yn yr adran hon, mae'n rhaid i chi roi manylion unrhyw swyddi ar adeg gwneud y cais a'r rhai hynny y rhagwelir y byddant yn cael eu diogelu neu eu creu o ganlyniad i'r cyllid grant hwn.

Adran 2 – Manylion y Prosiect

Yn yr adran hon, mae'n rhaid i chi egluro eich prosiect arfaethedig, pa effaith gaiff y grant ar y busnes a sut y bydd yn helpu i gefnogi cynaliadwyedd eich busnes.

Gofynnir i chi hefyd ddangos sut bydd eich prosiect yn cyd-fynd ag Addunedau'r Contract Economaidd a pholisi Gwaith Teg Llywodraeth Cymru.

Mae 4 adduned yn y Contract Economaidd, ac yn yr adran hon, mae'n rhaid i chi egluro sut mae eich busnes yn cyd-fynd â 2 neu ragor o'r addunedau hyn. I'ch helpu i ddeall addunedau'r Contract Economaidd, edrychwch ar [Y Contract Economaidd | Busnes Cymru \(llyw.cymru\)](#).

Yn ogystal â'r adran ar Addunedau Economaidd, mae'r adran hon yn gofyn am eglurder ac ymrwymiad ar eich arferion gwaith teg. Mae gwaith teg yn golygu bod amodau amlwg yn bodoli yn y gwaith sy'n golygu bod gweithwyr yn cael eu gwobrwyo, yn cael eu clywed a'u cynrychioli, yn ddiogel ac yn gallu symud ymlaen mewn amgylchedd gwaith iach a chynhwysol lle caiff hawliau eu parchu.

Bydd y camau bydd sefydliad yn eu cymryd i fynd ar drywydd gwaith teg yn dibynnu ar amgylchiadau penodol y sefydliad hwnnw. Efallai na fydd rhai camau'n briodol nac yn ymarferol i bob sefydliad, mater i bob sefydliad yw penderfynu pa gamau sy'n addas.

Gweler hefyd [Canllaw i waith teg | LLYW.CYMRU](#) i gael rhagor o wybodaeth i'ch helpu i lenwi'r adran hon o'r cais.

Gofynnwn i chi hefyd ddisgrifio llinell amser y prosiect, yr adnoddau sydd eu hangen, unrhyw risgiau cysylltiedig a'r hyn y gallwch ei wneud i liniaru'r rhain.

Adran 3 – Gwybodaeth Ariannol

Yn yr adran hon bydd angen i chi roi manylion am gostau'r prosiect, ffynhonnell eich arian cyfatebol a faint o gyllid sydd ei angen arnoch i alluogi'r prosiect i fwrw ymlaen er mwyn i ni benderfynu ar hyfywedd y prosiect. Sylwer mai dim ond yr isafswm o gyllid sydd ei angen arnoch chi i alluogi cyflawni'r prosiect y gallwch chi wneud cais amdano, a bydd yn rhaid i chi lofnodi datganiad yn nodi hyn, cyn cyflwyno eich cais.

Adran 4 – Marchnata, cyhoedduswydd a'r Gymraeg

Yn yr adran hon bydd angen i chi ddarparu manylion am ba gyhoedduswydd fydd yn rhan o'r prosiect. Bydd gofyn i chi egluro'r cyhoedduswydd a'r marchnata sydd wedi eu cynllunio ar gyfer eich cynnig a sut y cânt eu gweithredu. Rhaid i chi hefyd gynnwys sut bydd y Gymraeg yn cael ei chynnwys yn eich prosiect a sut bydd yn cyfrannu at flaenoriaethau Llywodraeth Cymru ar gyfer y Gymraeg a'r targed o filiwn o siaradwyr Cymraeg erbyn 2050 fel y nodir yn Cymraeg 2050.

Adran 5 – Rhestr wirio ar gyfer yr wybodaeth ofynnol

Gwnewch yn siŵr eich bod wedi cynnwys yr holl ddogfennau angenrheidiol yn ogystal â'r ffurflen gais.

Adran 6 – Datganiadau

Mae'n bwysig iawn eich bod wedi darllen y ddogfen ganllawiau hon ac yn deall y telerau ac amodau sy'n gysylltiedig â'r cais hwn am Grant gan fod hyn yn rhan o'r contract rhyngoch chi a Llywodraeth Cymru.

Os ydych chi'n cytuno â'r telerau ac amodau yn y ddogfen hon ac y gallwch chi gadarnhau bod yr wybodaeth sy'n cael ei rhoi yn y cais yn wir ac yn gywir, mae'n rhaid i chi roi tic yn y blwch a chyflwyno eich cais.

Ar ôl ei llenwi, cyflwynwch eich ffurflen gais a'r dogfennau ategol i CymorthAriannuCymruGreadigol@llyw.cymru.

Dylai ymgeiswyr nodi ei bod hi'n bosibl gwrthod ceisiadau sydd â data anghyflawn neu anghywir neu geisiadau heb y dogfennau ategol angenrheidiol.

Ni ddylech ddechrau ar y prosiect nes bod eich cais wedi ei gymeradwyo a'ch bod wedi derbyn llythyr cynnig. Os byddwch yn gwneud hynny, gallech annilysu eich cais yn llwyr, hyd yn oed os byddwch yn llwyddiannus.

Gwerthuso Prosiectau

Bydd Cymru Greadigol yn dyfarnu cyllid i geisiadau sy'n cyd-fynd â'n prif egwyddorion, fel y nodir yn y tabl isod. Er na fyddem yn disgwyl i brosiectau unigol gyflawni pob un o'r rhain yn uniongyrchol, rhaid i brosiectau gyflawni yn erbyn y meini prawf penodol ar gyfer y cynllun hwn. Bydd prosiectau sy'n targedu'r meysydd hyn yn uniongyrchol yn cael eu blaenoriaethu. Felly, dylid teilwra eich cais i ddangos sut rydych chi'n cyflawni'r rhain;

Prif egwyddorion cyllido Cymru Greadigol:

Dylai cyllid a ddyfernir i fusnesau:

Cydweddu Strategaethau

Cyflawni ein blaenoriaethau ar gyfer y diwydiannau creadigol yng Nghymru – Bydd y cyllid yn cael ei ddarparu i gyflawni uchelgeisiau Cymru Greadigol ar gyfer y diwydiannau creadigol, a'r blaenoriaethau a nodir yn Rhaglen Lywodraethu Llywodraeth Cymru. Bydd yn manteisio i'r eithaf ar gyfleoedd i gefnogi sgiliau a datblygu talent, amrywiaeth a chynhwysiant yn ei ystyr ehangaf, gwaith teg, cynaliadwyedd, a hyrwyddo ein diwylliant a'r iaith Gymraeg. Bydd cyllid yn cael ei flaenoriaethu ar gyfer y prosiectau hynny sy'n gwneud gwahaniaeth i dirwedd y diwydiannau creadigol yng Nghymru yn y tymor canolig i'r tymor hir

Creu'r manteision mwyaf i Gymru, gan gynnwys manteision economaidd Bydd cyllid yn cael ei dargedu at brosiectau sy'n sicrhau'r elw mwyaf posibl ar fuddsoddiad, i sicrhau bod cyllidebau cyfyngedig yn darparu'r gwerth gorau posibl i Gymru.

Ar ôl i ni dderbyn eich cais wedi'i gwblhau, byddwn yn cynnal archwiliadau ac yn ei werthuso yn unol â'r meini prawf sgorio. Rydym yn gobeithio rhoi gwybod i bob ymgeisydd am ein penderfyniadau cyn gynted â phosibl ar ôl cwblhau'r broses hon.

Caiff pob prosiect ei werthuso mewn dau gam:

- **Cam cyntaf** – cynnal archwiliadau i sicrhau bod yr holl feini prawf cymhwysedd sylfaenol wedi cael eu bodloni yn Atodiad 1, gan gynnwys alinio'r prosiect â'n prif egwyddorion cyllido fel yr amlinellir yn y tabl uchod. Bydd ceisiadau / prosiectau nad ydynt yn bodloni'r holl wiriadau cymhwysedd, neu nad ydynt yn bodloni ein hamcanion strategol ar gyfer cyllid, yn cael eu gwrthod.
- **Ail gam** – Bydd ceisiadau sydd wedi bodloni'r holl feini prawf cymhwysedd uchod ac sy'n cyd-fynd â'n prif egwyddorion cyllido yn cael eu harfarnu yn unol â'r meini prawf gwerthuso yn Atodiad 2. Mae hwn yn gynllun cystadleuol ac felly, oherwydd y gyllideb sydd ar gael, dim ond y prosiectau sy'n cael y sgoriau uchaf fydd yn cael eu cefnogi.

Bydd Diwydrwydd Dyladwy yn cael ei gynnal ar bob cais. Bydd hyn yn cynnwys adolygiad o'ch rhagamcanion ariannol, archwiliad twyll, ac archwiliadau ar Gyfarwyddwyr eich cwmni. Os ydych chi'n ymwneud â busnes sydd mewn dyled i Lywodraeth Cymru, mae'n annhebygol y byddwch yn gallu gwneud cais am ragor o gyllid a dylech drafod hyn â ni cyn gwneud unrhyw gais.

Bydd ceisiadau llwyddiannus yn cael llythyr Cynnig Grant a fydd yn amlinellu manylion telerau ac amodau ein cynlluniau grant a manylion sy'n berthnasol i'r CWPF. Ar ôl i'r ymgeiswyr gael y llythyr hwn, ac ar yr amod eu bod yn fodlon â'r telerau ac amodau sy'n cael eu hamlinellu yn y cynnig grant, bydd angen iddynt ei lofnodi a'i ddychwelyd atom cyn gynted â phosibl.

Byddwn yn cytuno ar yr amserlenni ar gyfer cyflawni a chwblhau'r prosiect, ynghyd ag amserlen y taliadau, gyda'r ymgeiswyr llwyddiannus.

Byddwn yn dal ati i gadw cofnod o'r allbynnau y cytunwyd arnynt i'w cyflawni am hyd at 12 mis ar ôl i'r cyfnod cyllido ddod i ben a byddant yn amod o'r cynnig grant.

Fel rhan o'n cefnogaeth, disgwylir y bydd pob cais yn rhoi adborth parhaus. Mae Cymru Greadigol wedi datblygu ffurflen adrodd safonol a rhoddir copi i ymgeiswyr llwyddiannus yn y cam cynnig cyllid i gasglu'r data angenrheidiol sydd angen ei adrodd yn ôl i ni am hyd at 12 mis ar ôl diwedd y CWPF.

Allbynnau a chanlyniadau

Bydd y cyllid yn canolbwyntio ar nifer o allbynnau a chanlyniadau allweddol, gan gynnwys:

- Gwariant ar gynnyrch, gwasanaethau a gweithlu yng Nghymru
- Eiddo deallusol sydd wedi ei greu / cadw
- Creu nifer o swyddi
- Cefnogi nifer o unigolion / gweithwyr llawrydd
- Mynd i'r afael â thangynrychiolaeth yn y sector
- Hyrwyddo'r Gymraeg
- Cynnydd mewn lefelau sgiliau
- Mwy o wariant ar ymchwil a datblygu (masnacheiddio)
- Cyfleoedd i wella cynaliadwyedd
- Mwy o gyfleoedd ar gyfer criwiau
- Mwy o gyfleoedd i fusnesau creadigol

Bydd gofyn i'r ymgeiswyr ddewis allbynnau perthnasol wrth wneud cais, a bydd y rhain yn cael eu nodi ar y llythyr cynnig.

Ar gyfer allbynnau prosiectau sy'n benodol i sgiliau

Bydd y cyllid yn canolbwyntio ar nifer o allbynnau a chanlyniadau allweddol, gan gynnwys:

- Cefnogi nifer o unigolion / gweithwyr llawrydd
- Nifer y cwmnïau a gefnogwyd
- Nifer y gweithdai/sesiynau hyfforddi a ddarparwyd
- Nifer y lleoliadau profiad gwaith
- Cynhyrchu adnoddau addysgeg
- Recriwtio sy'n dangos amrywiaeth a chynhwysiant
- Hybu'r Gymraeg
- Nifer y lleoliadau hyfforddiant a/neu brofiad gwaith a sicrhawyd
- Adroddiad gwerthuso i gynnwys data dienw cyfanredol ar gyfranogwyr sy'n elwa ar hyfforddiant, gan gynnwys;
 - rhyw/amrywiaeth
 - cyfradd oedran
 - rhanbarth preswyllo yng Nghymru

Cymeradwyo Prosiectau

- Ar ôl derbyn cymeradwyaeth fewnol Llywodraeth Cymru, bydd yr ymgeiswyr yn cael gwybod am y penderfyniad terfynol a bydd llythyrau cynnig yn cael eu hanfon at yr ymgeiswyr llwyddiannus
- Bydd angen llofnodi'r llythyrau cynnig a dychwelyd un copi i Lywodraeth Cymru cyn i'r prosiect gychwyn.
- Gofynnir i ymgeiswyr llwyddiannus ymrwmo i [God Ymarfer Llywodraeth Cymru: Cyflogaeth Foesebol mewn Cadwyni Cyflenwi](#)

Apelio

Mae CWPFF yn gronfa ddewisol heb broses apelio benodol. Rhoddir gwybod i ymgeiswyr aflwyddiannus ar ôl i ni wneud ein penderfyniad.

Amserlen

Bydd y cyfnod cyllido cymwys yn cwmpasu'r dyddiad cymeradwyo ar y llythyr cynnig tan 31 Mawrth 2027.

Proses hawlio ac amodau'r gronfa

Bydd y dyfarniad yn cael ei dalu ar sail gwariant sydd wedi ei dalu. Mae hyn yn golygu y bydd angen i ymgeiswyr ddangos tystiolaeth bod digon o lif arian neu arian wrth gefn ar gael i ariannu cyfanswm costau'r prosiect ar y pwynt darparu. Bydd yr hawliadau ar gyfer elfen grant Llywodraeth Cymru yn cael eu talu ar ôl cyflawni'r prosiect, hynny yw nid yw'r taliad yn cael ei wneud ymlaen llaw. [Yr hyn y mae Llywodraeth Cymru yn ei ddisgwyl gan y rhai hynny sy'n derbyn grant \[HTML\] | LLYW.CYMRU](#)

Amserlen Hawlio

Gofynnir i chi roi amserlen taliadau wedi ei chynllunio ar gyfer y cyfnod cyllido llawn ar gyfer eich prosiect rhwng 1 Ebrill 2026 a 31 Mawrth 2027. Bydd angen cyflwyno pob hawliad erbyn y dyddiad cau ar 1 Mawrth ar gyfer hawliad terfynol 2027.

Talu a Monitro

- Os bydd eich cais yn llwyddiannus, bydd angen bodloni'r amodau talu a nodir yn amserlen y llythyr cynnig.
- **'Costau a Dalwyd'** yw costau nwyddau rydych chi wedi talu amdanynt neu a setlir fel arall gennych chi. Bydd angen tystiolaeth o daliadau ar gyfer pob sefydliad.
- Bydd ffurflenni hawlio'n cael eu hanfon ar gais ac mae modd eu cyflwyno drwy e-bost i CymorthAriannuCymruGreadigol@llyw.cymru. Bydd angen darparu tystiolaeth lawn cyn gwneud unrhyw daliadau i brosiectau am ôl-daliadau. Rhoddir manylion yn eich llythyr cynnig am yr hyn y bydd angen i chi ei ddarparu wrth hawlio.
- Bydd y taliad yn cael ei wneud 4 diwrnod gwaith ar ôl iddo gael ei gymeradwyo.

Monitro ar ôl Cwblhau

Byddwn yn dal ati i gadw cofnod o'r allbynnau y cytunwyd arnynt i'w cyflawni am hyd at 12 mis ar ôl i'r cyfnod cyllido ddod i ben a byddant yn amod o'r cynnig grant.

Mae Llywodraeth Cymru wedi ymrwmo i werthuso llwyddiant y grant hwn ac mae'n bwriadu cynnal gwerthusiad mewnol o'r CWPF. Rhagwelir y bydd yr ymchwil hon yn archwilio gweithrediad ac effaith y gweithgareddau a gyflawnwyd. Bydd yn asesu i ba raddau mae modd priodoli'r allbynnau a'r canlyniadau'n uniongyrchol i weithgareddau'r cynllun ac yn archwilio a wireddwyd effeithiau ehangach a ragwelwyd neu nas rhagwelwyd.

Efallai y bydd Llywodraeth Cymru neu drydydd parti a fydd yn gweithredu ar ran Llywodraeth Cymru yn cysylltu â chi at ddibenion ymchwil a gwerthuso a/neu i chi roi adborth ar eich profiad o'r cynllun. Bydd yr wybodaeth hon yn cael ei dadansoddi a'i chyflwyno'n ddiennw yn unol â'r Hysbysiad Preifatrwydd.

Ad-dalu Grantiau

Dylai ymgeiswyr nodi y gall Llywodraeth Cymru fynnu bod y grant yn cael ei ad-dalu'n llawn neu'n rhannol os nad yw'r arian yn cael ei ddefnyddio at y dibenion a nodir ar y ffurflen gais. Mae'r ymgeisydd yn ymrwmo i gytundeb, a gorfodir hyn drwy ofyn am brawf ar ôl dyfarnu'r grant.

Rheoli cymorthdaliadau yn y Deyrnas Unedig

Rhaid i chi sicrhau bod y cyllid yn cael ei ddefnyddio yn unol â'r cytundebau perthnasol sydd yn rheolau Sefydliad Masnach y Byd, Cytundeb Masnach a Chydweithredu'r Deyrnas Unedig a'r Undeb Ewropeaidd, unrhyw Gytundeb Masnach Rydd sy'n cynnwys y Deyrnas Unedig, Protocol Gogledd Iwerddon ac unrhyw ddeddfwriaeth ddomestig berthnasol. Fel rhan o'ch cais, bydd angen i chi ddarparu manylion unrhyw gyllid blaenorol y mae eich busnes wedi ei dderbyn.

Os byddwch yn llwyddiannus, bydd eich cais yn cyfrif fel Cymorth Ariannol Lleiaf (MFA) yn unol â Rhan 3 Pennod 2 o Ddeddf Rheoli Cymorthdaliadau 2022 (neu SAFA* /cymorth de minimis yn flaenorol), yn unol ag Erthygl 3.2 paragraff 4 o Gytundeb Masnach a Chydweithredu'r Deyrnas Unedig a'r Undeb Ewropeaidd. Mae hwn yn cyfyngu ar faint o gymorth y gall busnes ei dderbyn gan y wladwriaeth.

Os ydych wedi derbyn MFA, SAFA neu de minimis yn y gorffennol, dylech fod wedi cael hysbysiad ysgrifenedig pan gawsoch y cymorth hwnnw. Bydd angen i chi ychwanegu'r dyfarniad hwn at gyfanswm cyffredinol eich MFA dros y tair blynedd ariannol ddiwethaf. Rhaid iddo fod yn llai na thua £315,000 ynghyd ag unrhyw ddatganiadau neu hawliadau MFA yn y dyfodol, a rhaid i chi ddatgan y swm i ni yn ystod y cam ymgeisio.

Chi sy'n gyfrifol am sicrhau bod y Dibenion yn cael eu darparu yn unol â'r meini prawf Cymorth Gwladwriaethol y dyfernir y cyllid arnynt.

Os byddwch yn croesi'r trothwy hwn, yna chi fydd yn wynebu unrhyw gamau gweithredu a ddaw yn sgil hynny, gan gynnwys ad-dalu'r cymorth a dderbyniwyd.

I gael rhagor o wybodaeth, edrychwch ar y [Canllawiau Statudol ar Drefn Rheoli Cymorthdaliadau'r Deyrnas Unedig](#)

Os nad yw'r cymhorthdal Cymorth Ariannol Lleiaf yn briodol i'ch sefydliad, efallai y byddwn yn ystyried dyfarnu'r cyllid drwy [Gynllun Cymorth Sector Creadigol cofrestredig Llywodraeth Cymru yn unol â Chyfeirnod y cynllun SC11327.](#)

Y Contract Economaidd

Addunedau'r Contract Economaidd a Gwaith Teg

Mae'r Contract Economaidd yn ymrwymiad i ddarparu buddsoddiad cyhoeddus sy'n blaenoriaethu anghenion cymdeithasol ac amgylcheddol Cymru ar yr un pryd ag adeiladu economi llesiant fwy cydnerth a ffyniannus. Wrth galon ein dull gweithredu Rhywbeth am Rywbeth, mae cytundeb rhwng Llywodraeth Cymru a busnesau ar y camau y bydd y naill ochr a'r llall yn eu cymryd sy'n cyfrannu at fynd i'r afael â'r heriau sydd o'n blaenau ac i wella bywydau pobl ar hyd a lled Cymru.

Cyhoeddusrwydd

Bydd angen i bob cais llwyddiannus:

- Gytuno i gael ei gynnwys yn yr holl ddeunydd cyhoeddusrwydd, deunydd marchnata a datganiadau i'r wasg y byddwn yn eu cynhyrchu.
- Fel amod cyllido, byddwch yn cytuno i gwrdd â'n tîm Cyfathrebu a Marchnata ac ymgymryd â hyd at 3 blynedd o gyhoeddusrwydd ar y cyd â Cymru Greadigol. Bydd hyn yn cynnwys darparu cronfa o ddelweddau ac asedau fideo i'w defnyddio ar ein gwefan a'n sianeli cyfryngau cymdeithasol, a chytuno i ni dynnu sylw at eich prosiect yn ein gweithgarwch yn y wasg ac mewn cyhoeddusrwydd os bydd angen. Byddwn hefyd yn gofyn i chi gydnabod ein cefnogaeth ac ymgorffori ein logo ar wefannau prosiectau perthnasol. Bydd ymgeiswyr llwyddiannus yn cael eu hysbysu cyn rhyddhau'r deunydd yn gyhoeddus.

Y Gymraeg

Mae Llywodraeth Cymru wedi ymrwymo i hyrwyddo ac i ddatblygu'r Gymraeg. Mae'r diwydiannau creadigol yn chwarae rhan allweddol drwy gyfrannu at flaenoriaethau Llywodraeth Cymru ar gyfer y Gymraeg a'r targed o filiwn o siaradwyr Cymraeg erbyn 2050 fel y nodir yn Cymraeg 2050. Rydym yn croesawu ceisiadau ar gyfer prosiectau sy'n cefnogi ein huchelgeisiau ac yn manteisio i'r eithaf ar gyfleoedd i hyrwyddo'r Gymraeg. Mae blaenoriaethau iaith Gymraeg yn un o'r amrywiol feysydd y byddwn yn eu hystyried fel rhan o'n hasesiad o addasrwydd strategol wrth adolygu prosiectau.

Deddf Llesiant Cenedlaethau'r Dyfodol (Cymru) 2015

Mae amcanion y Ddeddf yn dangos sut bydd pob corff cyhoeddus yn gweithio i gyflawni'r weledigaeth ar gyfer Cymru a nodir yn y 'nodau llesiant'. [Mae'r saith nod llesiant](#) yn dangos y Gymru yr hoffem ei gweld. Mae'r Ddeddf yn ei gwneud yn glir bod yn rhaid i'r cyrff cyhoeddus a restrir weithio i gyflawni'r holl nodau, nid dim ond un neu ddau. Bydd nodi ac egluro sut mae eich prosiect yn cyflawni'r nodau hyn yn bwysig wrth asesu'r cais.

Hysbysiad Preifatrwydd

- Llywodraeth Cymru yw'r Rheolydd Data ar gyfer unrhyw wybodaeth rydych chi'n ei darparu. Mae manylion llawn ein polisi preifatrwydd ar gael ar [dudalen yr Hysbysiad Preifatrwydd](#).

Bydd yr wybodaeth a roddwch yn gymorth i ddatblygu cronfa ddata o fusnesau cerddoriaeth. A fyddech cystal â chadarnhau yn yr adran ar eich ffurflen gais eich bod yn fodlon bwrw ymlaen ar y sail hon er mwyn i chi allu parhau i gael cymorth a chynghor gan Lywodraeth Cymru.

Gwnewch yn siŵr eich bod wedi darllen, deall a derbyn y 'Nodiadau Cyfarwyddyd' a'r 'Hysbysiad Preifatrwydd' cyn i chi ddechrau'r cais.

Atodiad 1 - Meini Prawf Gwerthuso

Cam 1 – Meini Prawf Cymhwysedd

- Rhaid i ymgeiswyr fod yn gweithredu yn y sector creadigol yng Nghymru.
- Rhaid i ymgeiswyr fod wedi eu lleoli yng Nghymru ac yn gweithredu yno. Oni ddarperir cyfiawnhad ynghylch sut bydd y prosiect o fudd yng Nghymru.
- Rhaid bod y busnes wedi bod yn masnachu cyn 1 Ebrill 2025 ac yn dal i fasnachu (bydd angen tystiolaeth o hyn ar ffurf cyfrifon ariannol o'r cyfnod ariannol diwethaf)
- Os yw trosiant y busnes yn fwy na £90,000, rhaid bod y busnes wedi cofrestru at ddibenion TAW neu fod y sector wedi ei eithrio rhag TAW. Ceir manylion am eithriadau rhag TAW yn:
<https://www.gov.uk/guidance/vat-exemption-and-partial-exemption>
- Gall unig fasnachwyr nad ydynt yn cyflogi unrhyw staff eraill wneud cais cyn belled â'u bod yn bodloni'r holl feini prawf eraill. I gefnogi eu cais, bydd gofyn i'r ymgeiswyr hyn gyflwyno copi o'u Ffurflen Hunanasesu ddiweddaraf sy'n dangos yr enillion a'r dreth sy'n ddyledus, a thystiolaeth bod y taliad wedi ei wneud.
- Rhaid eich bod yn talu gweithwyr drwy Talu Wrth Ennill ar 1 Ebrill 2026.
- Os mai dim ond 1 person rydych chi'n ei gyflogi, rhaid ei dalu drwy Talu Wrth Ennill.

Cam 2 – Meini Prawf Gwerthuso

Bydd angen i brosiectau fodloni'r egwyddorion cyllido a nodir uchod er mwyn symud i'r ail gam i'w hasesu ar sail y meini prawf a ganlyn:

MPG	Meini Prawf Gwerthuso	Pwysoliad	Sgôr
1	Cydweddu Strategaethau <ul style="list-style-type: none">• Cydweddu â'r egwyddorion cyllido cyffredinol• A yw eich prosiect yn sicrhau'r manteision mwyaf posibl i Gymru, gan gynnwys manteision economaidd• Yn cyd-fynd â Rhaglen Lywodraethu Llywodraeth Cymru a Llesiant Cenedlaethau'r Dyfodol	x 10	/5
2	Meini prawf y prosiect <ul style="list-style-type: none">• A yw eich prosiect yn cyflawni ein blaenoriaethau ar gyfer y diwydiannau creadigol yng Nghymru• Ansawdd y cais ac arloesi	x 10	/5
3.	Tystiolaeth o'r Angen <ul style="list-style-type: none">• Pam fod angen cyllid gan Lywodraeth Cymru er mwyn bwrw ymlaen â'r prosiect hwn? Er enghraifft, pam mae angen y cyllid arnoch chi? A fydd yn cyflymu'r prosiect? A fyddai'n digwydd heb gymorth?	x 5	/5
4.	Risgiau, Gweithredu a Chyflawni'r Prosiect <p>Ansawdd yr wybodaeth a ddarperir ar gyfer:</p> <ul style="list-style-type: none">• Cynllun y prosiect, amserlen ac adnoddau'r tîm• Strwythur y Tîm Rheoli• Partneriaid / cydweithio ar brosiectau• Risgiau'r Prosiect	x 5	/5

5.	Canlyniadau'r Prosiect <ul style="list-style-type: none"> • Ansawdd targedau'r prosiect: • Allbynnau ac elfennau i'w cyflawni, a ddefnyddir i fesur llwyddiant y prosiect • Sgiliau • Canlyniadau amrywiaeth a chynhwysiant • Canlyniadau o ran y Gymraeg • Gwybodaeth manwl am sut bydd y rhain yn cael eu mesur 	× 10	/5
6.	Costau'r Prosiect a Gwerth am Arian <ul style="list-style-type: none"> • Mae'r cynnig cyffredinol yn cynrychioli gwerth am arian • Mae'r gweithgareddau a'r costau cysylltiedig yn cynrychioli gwerth realistig a'r gwerth gorau • Costau'r prosiect, amserlen hawlio • Buddion disgwyltiedig yn gymesur â chostau • Tystiolaeth dda wedi ei darparu ar gyfer strategaeth ymadael a chynaliadwyedd tymor hir y cynnig • Gallu cael effaith ar y sector dros gyfnod hirach 	× 10	/5

Cyfanswm allan

Matrics sgorio

Sgôr	Dangosydd	Cyllidadwy
5	Eithriadol – Roedd yr ymateb yn gadarn, yn fanwl ac yn seiliedig ar yr holl agweddau perthnasol, gan ddarparu tystiolaeth gref y byddai'r meini prawf yn cael eu bodloni, heb unrhyw wendidau na meysydd sy'n peri pryder o ran y cynnwys.	le
3	Ansawdd uchel – Roedd yr ymateb yn cyflwyno tystiolaeth y byddai'r meini prawf yn cael eu bodloni, yn dda mewn sawl ffordd ond gyda mân wendidau neu bryderon ynghylch y cynnwys.	le
1*	Gwael – Nid oedd yr ymateb yn darparu llawer o dystiolaeth y byddai'r meini prawf yn cael eu bodloni, roedd gwendidau neu bryderon mawr o ran y cynnwys. Nid oedd llawer o fanylder/eglurder yn yr ymateb.	Na
0*	Annerbyniol – Nid oedd yr ymateb yn darparu tystiolaeth y byddai'r meini prawf yn cael eu bodloni; roedd yn gwbl anfoddhaol o ran y cynnwys. Nodwyd gwendidau, problemau neu fylchau sylweddol. Roedd yr ymateb wedi ei gyfleu'n wael a/neu'n anghyson.	Na

*Os cewch sgôr o 1 neu 0 ar gyfer unrhyw gwestiwn, bydd eich cais yn cael ei wrthod.